

## **Tulipokea katika Utimilifu wa Mungu**

Kwa kuwa katika utimilifu wake sisi sote tulipokea, na neema juu ya neema—  
**Yohana 1:16.**

Yesu alitafuta kuuokoa ulimwengu, sio kwa kuufuatisha, bali kwa kuufunulia ulimwengu nguvu ibadilishayo ya neema ya Mungu ili kuifinyanga na kuiumba tabia ya mwanadamu kuwa kama tabia ya Kristo Yesu.

Shetani amemwasilisha Mungu kama mbinafsi na mkandamizaji, anayetaka yote na kutotoa chochote, kama atakaye kuabudiwa na viumbe Vyake kwa ajili ya utukufu Wake mwenyewe bila kufanya juhudi zozote kwa ajili ya wema wao. Lakini karama ya Kristo hufunua moyo wa Baba.... Inatangaza wazi kwamba ingawa chuki ya Mungu dhidi ya dhambi ni kali kama mauti, upendo Wake kwa mwenye dhambi una nguvu kuliko mauti. Baada ya kuthibitisha ukombozi wetu, hataacha kitu chochote, hata kiwe kinapendwa, ambacho ni cha muhimu kwa ukamilishaji wa kazi Yake. Hakuna ukweli muhimu kwa wokovu wetu ambao umezuiliwa, hakuna muujiza wa rehema unaopuuzwa, hakuna wakala wa Uungu aliyeachwa bila kuhusishwa. Fadhila imezidi kuzidishwa, karama juu ya karama. Hazina yote ya mbinguni imefunguliwa kwa wote Anaotafuta kuwaokoa. Akiwa amekusanya utajiri wa ulimwengu na kuweka wazi rasilimali za nguvu isiyo na kikomo, Huvikabidhi vyote mikononi mwa Kristo na kusema, Hivi vyote ni kwa ajili ya mwanadamu. Tumia karama hizi ili kumshawishi mwanadamu kuwa hakuna upendo ulio mkuu kuliko wa Kwangu duniani au mbinguni. Furaha yake kuu zaidi itapatikana katika kunipenda Mimi.

Baba anaipokea kila nafsi ambayo Mwanawe ameinunua kwa karama ya uhai Wake. Kila uwezekano umefanywa kwa ajili yetu ili kupokea uweza wa Mungu, ambao utatuwezesha kuyashinda majaribu. Kwa njia ya utii kwa matakwa yote ya Mungu nafsi inatunzwa hata uzima wa milele.

Mungu anayo mbingu iliyojaa baraka ambazo Anataka kuzigawa kwa wale ambao wanamtafuta kwa bidii kwa ajili ya msaada ule ambao Bwana pekee ndiye anaweza kuutoa.